



**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD ŽIVINICE
GRADONAČELNIK**

**Broj: 01/2-04-89-1257/23
Živinice, 13.07.2023.godine**

Na osnovu člana 15. Zakona o principima lokalne samouprave („Službene novine FBiH“, broj: 49/06 i 51/09) i člana 38. Statuta Grada Živinice („Službeni glasnik Grada Živinice“ broj: 5/19 i 9/21), te Odluke o kriterijima, načinu i postupku dodjele sredstava za finansiranje start-up biznisa po javnom pozivu na području Grada Živinice broj 01/2-04-89-1256/23 od 13.07.2023. godine, Gradonačelnik raspisuje

JAVNI POZIV

za učešće u „**Programu podrške osnivanju biznisa (Start-up) za 2023.godinu**“

O PROGRAMU

U Strategiji razvoja Grada Živinice od 2017. do 2026. godine **povećana zaposlenost u privredi, poljoprivredi i uslužnim djelatnostima** uz povećanje dodane vrijednosti, prepoznata je kao strateški cilj 1.

Samozapošljavanje mladih putem programa razvoja poduzetništva i podrške osnivanja biznisa (Start-up) na području Grada Živinice jedna je značajnih metoda za postizanje ovog cilja.

Pri tome, fokus u 2023. će biti na pružanju podrške osnivanju biznisa koji obuhvataju djelatnosti iz sektora nove ekonomije (IT sektor), tradicionalnih i starih zanata, proizvodno orijentisanih djelatnosti, uslužno obrtničkih djelatnosti, te drugih djelatnosti koje **isključuju** primarnu trgovinsku i ugostiteljsku djelatnost, kao i ostale djelatnosti koje nisu dozvoljene zakonskom regulativom u BiH.

Planirana budžetska sredstva će se koristiti za podsticanje poduzetničke inicijative kroz nadmetanje poduzetničkih ideja i održivih poslovnih planova.

Za potrebe realizacije ovog Programa Grad Živinice je predvidio sredstva u Budžetu za 2023. godinu na poziciji „Podsticaj razvoju privrede za 2023. godinu – Start-Up“ planirane Budžetom Grada Živinice za 2023.godinu.

Novčana podrška namijenjena je sufinansiranju pokretanja biznisa kroz **finansiranje troškova registracije biznisa, troškova sredstava za rad, obrtnih sredstava, naknade za doprinose.**

Visina bespovratnih sredstava po biznis planu može iznositi maksimalno do **10.000,00 KM**. Pored novčane podrške učesnici mogu ostvariti pravo korištenja opremljenog kancelarijskog prostora u Poslovnom inkubatoru gradske uprave Grada Živinice u trajanju do 12 mjeseci.

Korisnik prostora za korištenje poslovnog prostora Gradu Živinice ne plaća zakupninu, niti je dužan da snosi troškove za utrošenu električnu energiju, grijanje, komunalije, čišćenje i tekuće održavanje istog. **(Odnosi se isključivo na djelatnosti za koje je prihvatljivo korištenje poslovnog inkubatora)**

CILJ JAVNOG POZIVA

Osnovni cilj javnog poziva je podsticaj poduzetništvu i samozapošljavanju mladih sa područja Grada Živinice kroz sufinansiranje troškova pokretanja i razvoja vlastitog biznisa.

PRAVO UČEŠĆA

Korisnici sredstava mogu biti osobe koje ispunjavaju sljedeće uslove:

- a) Nalaze se na evidenciji nezaposlenih JU Zavod za zapošljavanje TK – Biro za zapošljavanje Živinice
- b) Imaju prebivalište na području Grada Živinice
- c) Pripadaju kategoriji osoba starosti do 40 godina
- d) Da će po odobravanju poslovne ideje registrovati i razvijati vlastiti biznis na području Grada Živinice
- e) Da nisu bili korisnici bespovratnih sredstava u svrhu samozapošljavanja od strane Grada Živinice u ranijem periodu.

Prihvatljivim troškovima smatraće se:

- troškovi registracije biznisa (troškovi ljekarskog, troškovi izrade pečata, i sl.)
- nabavka stalnih sredstava za rad,
- nabavka obrtnih sredstava,
- naknade za obavezne doprinose.

Neprihvatljivim troškovima smatraće se svi ostali troškovi, kao što su:

- osnivački kapital,
- troškovi neto plate,
- troškovi režija i održavanja (voda, struja, grijanje, komunalni otpad, telekomunikacije, upravljanje zgradom, internet i sl.),
- kamate, knjigovodstvene usluge i sl.,
- police osiguranja imovine,
- kupovina i iznajmljivanje zemljišta, objekata i automobila,
- troškovi koji nisu relevantni za implementaciju biznis plana,
- troškovi pribavljanja neophodne dokumentacije (upotrebna dozvola, građevinska dozvola, okolišne dozvole, i sl.) te drugi troškovi koji se ne smatraju prihvatljivim.

Svi troškovi koji su nastali u periodu prije potpisivanja ugovora sa Gradom Živinice spadaju u kategoriju neprihvatljivih troškova.

Sve nabavke osnovnih i/ili obrtnih sredstava moraju biti žiralno plaćene i opravdane fakturom, fiskalnim računom na ime poslovnog subjekta i izvodom iz banke.

Bespovratna sredstva podrške će biti dodijeljena najuspješnijim aplikantima na bazi procesa odabira i stručne procjene izvodljivosti, kvaliteta i opravdanosti poslovnih ideja. Samo učešće u ovom programu ne podrazumijeva automatsku dodjelu bespovratnih sredstava.

Djelatnosti koje neće biti podržane kroz ovaj javni poziv su:

- trgovina na veliko i malo
- ugostiteljska djelatnost
- proizvodnja i promet duhana i duhanskih proizvoda,
- proizvodnja i promet alkoholnih pića,
- proizvodnja i promet oružja, te
- proizvodnja i promet proizvoda i usluga koji nisu dozvoljeni po BiH zakonima i propisima.

KOMISIJA

Postupak dodjele bespovratnih sredstava Grada Živinice namijenjenih podsticaju poduzetništva i samozapošljavanju mladih sa područja Grada Živinice provodi Komisija koju imenuje Gradonačelnik.

KRITERIJI I MJERILA

KRITERIJ	MJERILO	GRADACIJA
Kvalitet poslovne ideje - Jasno definirani: proizvodi, usluge, plan djelovanja, i rizici poslovanja	nije moguće utvrditi kvalitet	0 bodova
	kvalitetno	15 bodova
	izuzetno kvalitetno	20 bodova
Održivost biznisa - Očekivani profit u odnosu na visinu investicije	očekivani profit/ visina investicije	manji od 10% 5 bodova
		od 10 do 50% 15 bodova
		od 50 od 100% 20 bodova
Sufinansiranje - iznos vlastitih ulaganja u odnosu na traženi iznos od Grada (u %)	vlastita sredstva/ tražena sredstva	manje od 50% 5 bodova
		od 50 do 100% 15 bodova
		više od 100% 20 bodova
Mogućnost dodatnog zapošljavanja	broj dodatnih osoba	0 0 bodova
		1 ili 2 15 bodova
		više od 2 20 bodova
Pripadnost marginaliziranim kategorijama stanovništva - manjine, osobe sa invaliditetom, žene, samohrani roditelj i sl.	ne pripada	0 bodova
	pripada	10 bodova
Stepen inovativnosti 1	1-5	5 bodova
Stepen inovativnosti 2	6-10	10 bodova

Maksimalan broj bodova 100.

Biznis planovi koji budu bodovani sa manje od 50 bodova ne mogu dobiti podršku.

Ukoliko je ukupan iznos traženih sredstava od strane kandidata koji su ostvarili više od 50 bodova veći od ukupnog fonda Grada Živinice (**100.000,00 KM**), tada Komisija zadržava pravo da svim kandidatima sa 50 bodova ili više, predloži procentualno umanjenje traženog iznosa sredstava a do ukupne vrijednosti fonda.

PROCES EVALUACIJE BIZNIS PLANOVA

- Komisija u prvom koraku razmatra formalnu ispravnost prijava
- U drugom koraku formalno ispravne prijave Komisija boduje shodno kriterijima i sačinjava i objavljuje **Preliminarnu rang listu** na Oglasnoj tabli, te web stranici Grada Živinice www.gradzivinice.ba.
- Na objavljenu Preliminarnu listu podnosioci prijava u roku od 5 dana imaju pravo žalbe koja se podnosi **Drugostepenoj komisiji za odlučivanje po žalbama koju imenuje Gradonačelnik**.
- Po isteku roka za žalbu i rješavanja po pristiglim žalbama, Komisija u trećem koraku predlaže **Konačnu rang listu** te istu dostavlja Gradonačelniku.
- Gradonačelnik donosi **Konačnu rang listu** korisnika podrške koja se objavljuje na Oglasnoj tabli, te web stranici Grada Živinice www.gradzivinice.ba.
- Sa podnosiocima najbolje ocijenjenih biznis planova Grad Živinice zaključuje ugovore u kojima će se definisati međusobna prava i obaveze ugovornih strana, a posebno način i dinamika korištenja dodijeljenih finansijskih sredstava, monitoring implementacije prihvaćenog biznis plana i namjenski utrošak sredstava.

SADRŽAJ PRIJAVE ZA SUDJELOVANJE U JAVNOM POZIVU

Prijava mora biti potpuna i uz nju mora biti dostavljena sva dokumentacija tražena Javnim pozivom.

Prijava sadrži:

1. **Obrazac prijave** – preuzeti sa web stranice i popuniti na računaru, isprintati, i potpisati
2. **Obrazac biznis plana** – preuzeti sa web stranice i popuniti na računaru, isprintati, i potpisati
3. **Potvrdu od Biroa za zapošljavanje Živinice da se osoba nalazi na evidenciji nezaposlenih, ne stariju od 30 dana (original ili ovjerena kopija)**
4. **CIPS obrazac prijave prebivališta, ne stariji od 30 dana (original ili ovjerena kopija)**
5. **Kopiju lične karte**
6. **Dokaz o završenom stepenu školske spreme VSS ili SSS (kopija diplome)**
7. **Izjava o namjenskom utrošku dodijeljenih sredstava** – preuzeti sa web stranice (ovjerena u šalter Sali Grada Živinice)
8. **Izjava da aplikant prethodno nije bio korisnik bespovratnih sredstava u svrhu samozapošljavanja dodijeljenih od Grada Živinice.**

Prijava, Biznis plan i Izjave moraju biti dostavljene na aplikacionom obrascu i popunjene elektronski.

SVI PRETHODNO NAVEDENI OBRASCI MORAJU BITI POTPISANI VLASTORUČNO.

NAČIN PREUZIMANJA POTREBNE DOKUMENTACIJE

Nakon što Grad Živinice objavi poziv za podnošenje prijava, sva zainteresirana lica mogu preuzeti odgovarajuće obrasce za prijavu sa web stranice www.gradzivinice.ba.

NAPOMENA: Gradonačelnik zadržava pravo da poništi Javni poziv u svako vrijeme, ako procijeni da za to postoje opravdani razlozi.

NAČIN PODNOŠENJA PRIJAVE

Javni poziv ostaje otvoren 30 dana od dana objavljivanja.

Prijave je potrebno dostaviti najkasnije do **14.08.2023. godine do 15:00 sati**.

Prijave se mogu dostaviti putem preporučene pošte, kurirske pošte ili lično u pisarnicu Grada Živinice, adresa:

Grad Živinice, ulica Alije Izetbegovića br. 28, 75 2700 Živinice

Dokaz da je aplikacija dostavljena u roku predstavlja datum na poštanskom žigu ili dostavnici. **Sve prijave koje se dostavljaju po osnovu ovog javnog poziva moraju biti u zatvorenoj koverti sa naznakom „JAVNI POZIV „START-UP “ ZA 2023.g. – NE OTVARAJ“**

Nepotpune prijave se neće uzimati u razmatranje.

U postupku ovog javnog poziva Grad Živinice ne snosi nikakve troškove sudionicima.

Prispjela dokumentacija se neće vraćati.

INFO DAN: Grad Živinice će dana **28.07.2023.godine sa početkom u 14:00 sati** u velikoj sali Gradskog vijeća Živinice održati INFO DAN za sve zainteresovane osobe koje planiraju aplicirati na javni poziv „Start-Up 2023“. Cilj održavanja info dana jeste pružanje dodatnih pojašnjenja u vezi javnog poziva, te otklanjanje eventualnih nejasnoća u vezi istog.

Za sve dodatne informacije i pojašnjenja tokom perioda podnošenja prijave podnosioci zahtjeva mogu direktno uputiti pitanja i zahtjeve isključivo u pisanoj formi, na broj faksa +387 35 772-125 ili e-mail: biznis@gradzivinice.ba

Pripremio: Admir Aljić _____

Predložio i kontrolisao: Indira Džeko _____

Kontrolisao: Suvad Butković _____

GRADONAČELNIK

dr.sc. Began Muhić

Dostavljeno:

1. Službi za lokalni ek. razvoj, finansije i trezor
2. Oglasna ploča Grada Živinice
3. Web stranica Grada Živinice
4. a/a